

兩朝綱目備考

欽定四庫全書

兩朝綱目備考卷十三

寧宗

嘉定四年

辛未春正月己丑

叙州蠻攻陷路店寨

馬湖夷都蠻攻嘉定府捷為縣之路店寨陷之馬湖

蠻者西蠻昆明之別種也其地在梁為南寧州承聖

中刺史徐文盛召去有蠻攢者遂據其地子孫相傳

後分為東西馬西蠻之地在唐為殷

案宋史殷作商蓋避廟諱改

馴騁浪四州其酋姓董氏隸戎州都督府國朝開寶
中德化將軍董春惜貢馬詔書嘉納之太平興國始
市馬其後又以木板來售蓋夷界多巨木邊民嗜利
者齎糧深入為之傭鋸官禁雖嚴而不能止也板之
大者徑六七尺厚尺許言為舟航樓觀之用則可長
三數丈蠻自載至敘州之江口與人互市太守高輝
始置場征之謂之抽收場至今不廢也馬湖之地東
南接石門

亦敘州
徽外蠻

西南接沙漠虛恨

嘉定府
徽外蠻

及黎雅

諸蠻與吐蕃之境而北接叙州之商州寨宣化縣西

接嘉定之賴因沐川捷為管下二寨名案宋史作北近捷為之沐川賴因砦西

北接叙州之宜賓凡蠻之地仰給者七村曰胡鹽或曰

會曰黎溪或曰泥溪曰平夷曰都夷曰什葛曰蒲潤或曰普潤

曰荒桃此七村多沃壤宜耕稼其民被氊椎髻而比

屋皆瓦屋如華人之居飲食種藝多與華同惟胡鹽

黎溪平夷三村兩輸漢蠻之稅謂之兩屬稅戶自叙

州沿流十里至馬湖江口又西泝七十里至安邊寨

又水陸行三百二十里至夷都村又水陸行一百八

十三里至天池此馬湖蠻王所居也自夷都溪口

在夷

都村之南
五十里

遵陸距利店沐川賴因龍鳩等寨僅二程

皆平原初賴因本夷地景德天聖間屢來寇掠治平
間把截將王文揆始據險立寨侵耕夷人山塙名賴
因庄夷人訴之事聞有旨以其地歸董蠻既而寨民
私賂之以償其侵地歲為紬三百匹幅廣二尺長二
丈於是蠻人每歲至賴因謂之索稅其後稅頗增寨

人亦厭苦之紹興末虛恨蠻犯龍蓬寨隆興初夷都
蠻復寇賴因詔用馮當可提點本路刑獄公事以經
制之當可築堡於龍蓬而伐菁於賴因以為戰地多
儲蓄備器械蠻不復至及是馬湖蠻將入寇而夷都
土蠻先以書抵利店寨將言之寨將亦謂蠻人要索
之常不即省歲除之前夕寨民有失牛者夜出求之
見火滿四山始疑寇至乃以狀白捷為縣未達而蠻
已大入或曰蠻始欲寇中鎮寨中鎮有備不可入聞

利店稍富實而寨丁少乃攻之知寨保義郎段松悉寨丁七十餘人遣之迎敵或死或逃蠻遂圍其寨寨地勢低蠻人憑高投木石以擊之衆莫能拒又二日蠻人以雲梯登城松力戰十三合無與援者寨民驚潰自投山水而死亡者數百人松為蠻所執齧割而殺之盡掠寨民之貲焚其居驅老弱婦女數百人而去松二子亦為所掠守臣許奕子然聞變急調兵救之至則蠻已遁矣既而蠻人釋所俘卒胡慶者俾持

牒以歸自稱都相公狀申嘉州官品大略言漢人不
償犒稅之故其後蠻人為招安將言初以敘州負其
板直故擊之道險不可進欲引歸而蠻師翁者謂始
出兵時嘗許以生口祀神今無所得神且怒由是移
兵攻利店亦莫知其情實云初慶元末宣化簿昌元
封壽源嘗為古戎邊志大略謂馬湖之警在嘉而不
在叙蓋一軍屯安邊一軍守真溪沙溪商州寨之間
皆宣化
縣界則馬湖不能遽踐吾境惟賴因中鎮地平而

近且蠻以索稅為詞往來通行於漢嘉之境一不如意則寇輒隨之矣至是果如所料

甲辰以四川鹽擔錢對減激賞絹一年

丙午詔安集殘破諸州

湖南江西諸州經賊踐者監司守臣考縣令安集之實第其能否以聞

二月乙卯誅李元礪

王簡卿時已械送元礪赴都既被命遂就磔于吉州

壬戌羅世傳補官

池州副都統許俊復言世傳生擒元礪已給元所降
賞錢二萬緡乞加官詔授世傳武翼郎閤門祗候四
月丙午賜黑風峒名効忠錫以銅印世傳乞補文資
乃以為通直郎簽書鎮南軍節度判官廳公事簡卿
遣吏迓之世傳疑不出

丙子雪

辛巳罷廣西諸州牛稅

閏二月丁未大風

辛未配臧吏

濠州推官鄭宰鍾離縣尉王御犯臧除名刺面配真
州池州

詔恪守賑恤令

諸路帥守監司守令恪守朝廷賑恤之令及盜發不
即捕者重罪之

三月都城疫

己未命臨安府賑給病民賜棺錢
四月戊申出內
庫錢瘞疫死貧民

丙子劉世雄伏誅

世雄為沔州將謀據仙人原為亂事覺伏誅

辛巳叙州蠻犯籠鳩堡

本路帥黃疇若伯庸調移屯西兵二百戍犍為縣朝
廷聞之四月己丑除知崇慶府李璫季允本路提點

刑獄

是春夏國叛金

夏人數為塔坦所攻遣使求援金主允濟新立不能
救塔坦至興靈而反夏人恨之金人亦為塔坦所擾
勢益衰夏國遂叛改元光定

夏四月甲申禁科折鹽酒

行下兩浙福建州縣

四川關外旱

己丑詔以吳曦沒官田租為關外四州及旱傷州縣

代輸秋稅

禁諸軍虛數冒請

聽自首違者重坐之

是月四川置安邊司

安觀文丙特為制置大使乃置安邊司以經制蠻事

俾李璠季允與許奕子然共領焉始議猶欲招安而

蠻人玩狎終不肯出大使司議遣兵平之季允謂然

而許成子在瀘南以謂曠日持久不如招納之利持

論不同由是久不決會叙南邊吏獲蠻人數十以告
鞫之其與於利店之亂者三人焉成子榜境上諭蠻
人能以利店所掠人口來吾即歸三人者金帛不問
也又遣諜入蠻中怵以利害無幾何蠻以印狀來願
盡歸俘掠如約安邊司聞而互招之蠻中悔於是季
允移檄願得三狄人成子曰如此則吾為失信蠻禍
必嫁於瀘不許已而大使又以為言成子曰吾知權
利害為生靈計耳即移書以鬼章事報之僚吏或請

進兵成子折之因以議不合求罷改知夔州始季允
聲言某日以兵出塞蠻頗憚之會東帥司揭榜叙州
境上大略言本司已與西路商量決無深入之理仰
邊民安業毋得驚擾蠻人見之知西路揚聲給已益
無所憚

五月戊辰親試舉人

賜禮部奏名進士趙建大等四百六十有五人及第

出身有差

眉人史公亮

原缺

天應援李僑故事請掛

冠詔並循從事郎致仕仍予官封國朝三百年新進士即日掛冠者惟兩蜀王昶李儋及公亮天應四人而已

六月丁亥余嶸使金不至而復

時金為塔坦所攻道不通故也 塔坦蓋靺鞨之後其國在元魏齊周之時稱勿吉至隋稱靺鞨地直長安東北千里東瀕海離為數十部部有黑水白山等名白山本臣高麗唐滅高麗其遺人並入渤海惟黑